

# 往生論

《課程補充資料》

## 往生論課程補充資料

1. 《佛藏經》卷1（念佛品）：「舍利弗。諸法若有決定體性。如析毛髮百分一者。是則諸佛不出於世。亦終不說諸法性空。舍利弗。諸法實空無性一相。所謂無相。如來悉見。如來以是說有念處。舍利弗。念處名爲無處無非處。無念無念業。無想無分別。無意無意業。無思無思業。無法無法相。皆無合散。是故賢聖名爲無分別者。是名念處。如來以是說有念處。隨順無所有故。名爲念處。隨順念佛名爲念處。舍利弗。云何名爲念佛。見無所有名爲念。佛告舍利弗。諸佛無量不可思議不可稱量。以是義故。見無所有名爲念佛。實名無分別。諸佛無分別。以是故言。念無分別即是念佛。復次見諸法實相名爲見佛。何等名爲諸法實相。所謂諸法畢竟空無所有。以是畢竟空無所有法念佛。復次如是法中。乃至小念尚不可得。是名念佛。舍利弗。是念佛法斷語言道過出諸念。不可得念是名念佛。舍利弗。一切諸念皆寂滅相。隨順是法。此則名爲

修習念佛。不可以色念佛。何以故。念色取相貪味爲識。無形無色無緣無性。是名念佛。是故當知。無有分別無取無捨。是真念佛。」(CBETA, T15, no. 653, p. 785, a17-b9)

《阿彌陀經疏鈔》卷1：「起信論云。心體離念。而起念念佛。豈不反擾其心。佛藏經云。無覺無觀。名爲念佛。無想無語。是名念佛。而起念念佛。豈不反背於佛。今謂滅諸覺觀。實相念佛。理則誠然。但以心雖離念。而無明染心。念念相續。如七年之病。久亂之民。故曰慣習。茲欲勉強遏捺。立使空寂。而止動歸止。止更彌動。縱麤念暫息。細念猶存。便謂相應。錯謬非小。既居凡地。未能絕慮忘緣。何不即緣慮而作修進。故以念還攻於念。念一佛名。換彼百千萬億之雜念也。而妄從真起。波逐水生。即念即空。居然本體。非於念外別得菩提。故云萬法虛僞。唯是一心。了悟自心。觸曰菩提矣。」(CBETA, X22, no. 424, p. 611, c6-17)